

Kuussuup (Austmannadalen) eqqissisimatitaanera pillugu Namminersornerullutik Oqartussat nalunaarutaat

Pinngortitamik illersuineq pillugu Inatsisartut inatsisaanni nr. 29-imi, 18. decembari 2003-imeersumi § 5, imm. 1, nr. 1, 4, 8-9, § 16, imm. 1, § 46, aamma § 60, imm. 2 aamma imm. 4, naapertorlugit aalajangersarneqarpoq:

Siunertaq sumiiffimmillu killiliineq

§ 1. Kuussuaq (Austmannadalen) taassumalu nunap eqqaa Nuup Kommunianiittoq, sumiiffiup isikkuata aamma kulturikkut oqaluttuarisaanerata allanngutsaaliorneqarnissaa kiisalu nunap nungullariartunnginnissaata isumannaallisaavigineqarnissaa siunertaralugu, eqqissisimatitassanngortinneqarpoq. Aammattaaq eqqissisimatitsinermit nunap ilaani savat nujuitsut nujuartatut uummasuusut illersorneqassapput.

Imm. 2. Aatsitassarsiornermut atatillugu misissueqqaarnernik, ujaasinernik piiaanermillu suliaqarnermi nalunaarut atuutinnilaq. Pinngortitamik illersuinissaq pillugu maleruagassat kiisalu sanaartornissaq ilaalu ilanngullugit, inatsisit sulianut taamaattunut piginnaatitsinermit imaluunniit akuersissuteqarnermut tungaviusut naapertorlugit kiisalu taakkuninnga ataatsimoortumik oqartussaasutut suliarinninnermut ilaatillugit aalajangersaavigineqartassapput.

§ 2. Nuna eqqissisimatitap nunap assingani ilanngussaq 1-imi takuneqarsinnaavoq.

Imm. 2. Sermip killinga atuallallugu sermip sinaata tungaanut eqqissisimatitamut killeqarfiuvoq.

Kikkulluunniit appakkaassinnaanerat atuinerlu

§ 3. Nalunaarummi matumani killiliinerit eqqaassanngikkaanni kikkulluunniit sumiiffimmut eqqissisimatitamut appakkaassinnaapput.

§ 4. Nunap eqqissisimatitap iluani tatsit, kuuit, kangerluit imaluunniit nunat, qanoq iliornikkulluunniit iliuuseqarluni eqqakkanik, aalisarnermi atortunik atornikunik, nalunaarsuutini imaluunniit ilisimatusarnermi atortunik qimataqarnikkut mingutsinneqarnissaat inerteqqutaavoq.

Imm. 2. Nunap naasuini innarliineq imaluunniit nunamik allanngortitsinerit inerteqqutaapput.

§ 5. Nunap eqqissisimatitap iluani savanik nujuitsunik nujuartatut uummasuusunik piniarneq inerteqqutaavoq.

§ 6. Nunap eqqissisimatitap iluani nunalerinermik suliaqarnerit, uumasuuteqarneq, narsaasioorneq imaluunniit naatitassanik ikkussuineq inerteqqutaapput.

Tupertorneq silamilu ikumatitsineq

§ 7. Nunap eqqissisimatitap iluani tupertorneq, silami ikumatitsineq, matumani gassimik sprittimillu ikummatilinnik il.il. atuneq ilanngullugit, uninngaffigisami taamaallaat ullunik tallimanik sivilissulimmi pisinnaapput. Tamatuma kingorna tupertorneq aamma silami ikumatitsineq, matumani gassimik sprittimillu assigisaannilluunniit ikummatilinnik atuneq ilanngullugit, ingerlaannassappat, tamanna siullermik uninngaffigisatut atornerqartumit minnerpaamik 100 meterinik ungasissulimmi taamaallaat pisinnaavoq, taamaattoq takuuk imm. 2.

Imm. 2. Nunaminertat aalajangersimasut tupertornermut aamma silami ikumatitsinermit atatillugu, matumani gassimik sprittimillu ikummatilinnik assigisaannilluunniit atuneq ilanngullugit, ullut unnuallu tallimat sinnerlugit sivilissulimmik atornerqartussat, Attaveqarnermut Avatangiisinullu Naalakkersuisoqarfimmut aamma Aatsitassanut Ikummatissanullu Pisorta qarfimmut tusarniaareernerup kingornatigut Nuummi kommunalbestyrelsimit toqqarneqassapput. Ullunit unnuanillu tallimanit sivilissulissumik sumi tupertortoqarsinnaanersoq aamma silami ikumatitsisoqarsinnaanersoq, matumani gassimik sprittimillu ikummatilinnik assigisaannilluunniit atuneq ilanngullugit, erseqqissumik nalunaaqutserneqassapput.

Imm. 3. Nunami eqqissisimatitami nunami naasut toqunerinik kipparlukunik kiisalu qissianik ikumatitassanik katersineq atuinerlu ajornartitaanngilaq.

Illuliorneq, sanaartorneq aamma pisuinnaat aqqutaat

§ 8. Nunami eqqissisimatitami illuliorneq imaluunniit aalaakkaasunik allanik sanaartorneq kiisalu aqquerniornerit aamma pisuinnartunut aqqutissiornerit inerteqqutaapput, taamaattoq takuuk imm. 2.

Imm. 2. Attaveqarnermut Avatangiisinullu Naalakkersuisoqarfik Nuummi kommunalbestyrelsi aamma Aatsitassanut Ikummatissanullu Pisorta qarfiup tusarniarneqareernerisa kingornatigut, illulionissamut allanillu aalaakkaasunik sananissamut akuersissuteqarsinnaavoq.

Imm. 3. Illuliat imaluunniit sanaartukkat aalaakkaasut allat annertussusissaat, suussusissaat, sumut inissinneqarnissaat, portussusissaat, ilusissaallu pillugit, kiisalu nunap naasullu ilusimisut iluseqaqqilersinnissaat pillugit Attaveqarnermut Avatangiisinullu Naalakkersuisoqarfik atugassarititaasussanik akuersissutini imm. 2 naapertorlugu tunniunneqartuni aalajangersaasinnaavoq.

§ 9. Pisuinnaat aqqutaat Attaveqarnermut Avatangiisinullu Naalakkersuisoqarfimmut aamma Aatsitassanut Ikummatissanullu Pisorta qarfimmut tusarniaareernerup kingornatigut Nuummi kommunalbestyrelsi innersuussuteqarnera naapertorlugu nalunaaqutsersorneqarsinnaapput.

Nunami imaanilu angalaneq

§ 10. Nunami eqqissisimatitami sikkilinnik aamma qamutinnik motorilinnik, matumani qamuteralaat (snescooter) ilanngullugit, angalaneq tamarmi inerteqqutaavoq, taamaattoq takuuk imm. 2.

Imm. 2. Ilisimatuussutsikkut misissuinerit atatillugu qamuteralannik atuneq Attaveqarnermut Avatangiisinullu Naalakkersuisoqarfip akuersissutigisinnavaa.

Imm. 3. Attaveqarnermut Avatangiisinullu Naalakkersuisoqarfik atugassarititaasussanik akuersissutini imm. 2 naapertorlugu tunniunneqartuni aalajangersaasinnaavoq.

§ 11. Nunami eqqissisimatitami tatsini kuunnilu angallatinik motorilinnik angalaneq inerteqqutaavoq.

Imm. 2. Aalisarnermut, piniarnermut aallaaniarnermut kiisalu ilisimatuussutsikkut misissuinerit atatillugu motorilinnik imaani angalanerit imm. 1-imi pineqanngillat.

Timmisartunik angalanerit

§ 12. Nunami eqqissisimatitami sumiiffimmi pineqartumi uumasooqarnera eqqarsaatigalugu 500 meterinit appasinnerusumi timmisartorneq kiisalu nunami eqqissisimatitami minnissaq inerteqqutaapput, taamaattoq imm. 2 – 5 takukkit.

Imm. 2. Aalajangersimasumik timmisartuussisarnerit akuersissuteqarfusut, annaassiniarnerit ujaasisarnerillu kiisalu nunami eqqissisimatitami ilisimatuussutsikkut siunertalinnik timmisartornerit imm. 1-imi inerteqquteqarnermit pineqanngillat.

Imm. 3. Annaassiniarnerit ujaasinernullu atatillugu kiisalu nunami eqqissisimatitami ilisimatuussutsikkut siunertalinnik minnerit imm. 1-imi inerteqquteqarnermit pineqanngillat.

Imm. 4. Imm. 2-mi aamma 3-mi taaneqartunit allaanerusunik pisoqartillugu, nunami eqqissisimatitamik timmisartornissanut minnissanullu Nuummi Kommunalbestyrelsimik aamma Aatsitassanut Ikummatissanullu Pisortaqarfimmik tusarniaareernerup kingornatigut, Attaveqarnermut Avatangiisinullu Naalakkersuisoqarfik akuersissuteqarsinnaavoq.

Imm. 5. Nuummi Kommunalbestyrelsimik aamma Aatsitassanut Ikummatissanullu Pisortaqarfimmik tusarniaareernerup kingornatigut Attaveqarnermut Avatangiisinullu Naalakkersuisoqarfik atugassarititaasussanik akuersissutini imm. 4 naapertorlugu tunniunneqartuni aalajangersaasinnaavoq.

Aqutsineq, nakkutilliineq aamma immikkut akuersissuteqartarnej

§ 13. Nuummi Kommunalbestyrelsimik aamma Aatsitassanut Ikummatissanullu Pisortaqarfimmik tusarniaareernerup kingornatigut nunamik eqqissisimatitamik aqutsinissamut pilersaarusiameq Attaveqarnermut Avatangiisinullu Naalakkersuisoqarfik suliaqassaaq.

§ 14. Nalunaarummi matumani aalajangersakkanik maleruaasoqarneranik Nuummi Kommunalbestyrelsi nakkutiginnissaaq.

§ 15. Nuummi kommunalbestyrelsimik aamma Aatsitassanut Ikummatissanullu Pisortaqarfimmik tusarniaareernerup kingornatigut, § 7, imm. 1-imi, § 10, imm. 1-imi kiisalu § 11, imm. 1-imi aalangersakkanik uniinissamik, Attaveqarnermut Avatangiisinullu Naalakkersuisoqarfik immikkut akuersissuteqarsinnaavoq.

§ 16. §§ 4-6-mik, § 7, imm. 1-imik, § 8, stk. 1-imik, § 10, imm. 1-imik, § 11, imm. 1-imik kiisalu § 12, imm. 1-imik unioqqutitsinerit akiliisitsissutaasinnaapput.

Imm. 2. § 8, imm. 2-mik aamma § 12, imm. 4-mik piumasaqaatinik aalajangersakkanik unioqqutitsinerit akiliisitsissutaasinnaapput.

Imm. 3. Suliffeqarfik tamakkiisumik ilaannakuusumilluunniit naalagaaffimmit, Namminersornerullutik Oqartussanit, kommunimit imaluunniit kommuninit ataatsimoortunit kommunalbestyrelsit nunaqarfinnilu aqutsisut il.il. pillugit Inatsisartut inatsisaanni pineqartunut ilaasunit, aktiaateqarluni piginneqatigiiffimmit, piginneqatigiiffimmit, piginneqatigiinnikkut ingerlatseqatigiiffimmit imaluunniit tamatumunnga assingusumit pigineqartoq unioqqutitsisuuppat, suliffeqarfik il.il. pineqartoq, pinerluttuleringeq pillugu inatsit malillugu akisussaasunngortinneqarsinnaavoq. Tamannattaaq aamma atuuppoq Namminersornerullutik Oqartussat, kommuni imaluunniit kommunit ataatsimoortut, kommunalbestyrelsit nunaqarfinnilu aqutsisut il.il. pillugit inatsisartut inatsisaanni pineqartunut ilaasut unioqqutitsisuupata.

Imm. 4. Imm. 1- 3 malillugit akiliisitsissutaasut Nunatta karsianut ikineqassapput.

§ 17. Nalunaarut ulloq 1. august 2008 atuutilerpoq.

Imm. 2. Peqatigitillugu Nuup Kommuneani savat nujuitsut nujuartatut uumasuusut eqqissisimatinneqarnerannut ileqqoreqqusaq, 28. august 1989-imeersoq, atorunnaarsinneqarpoq.

Namminersornerullutik Oqartussat, ulloq 14. juli 2008

Kim Kielsen

/

Steffen Ulrich-Lynge

Ilanngussaq 1

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut